

**Խոնարհում բոլոր հերոսների ու զոհվածների հիշատակի առաջ: Փա՛ռք հերոսներին և կեցցե՛ Հայաստանի Հանրապետությունը**

09.05.2026

Սիրելի՛ հայրենակիցներ,  
Մայիսի 9-ը մեզ համար ոչ միայն հաղթանակի, այլև խաղաղության արժեքը վերափմաստավորելու օր է: Այս օրը մենք հարգանքով հիշում ենք բոլոր նրանց, ովքեր պայքարեցին ֆաշիզմի դեմ՝ հանուն մարդկության ազատ ու արժանապատիվ ապագայի: Հայ ժողովուրդը նույնպես իր կարևոր ներդրումն ունեցավ այդ պայքարում՝ ցուցաբերելով խիզախություն և նվիրում: Այս հաղթանակը մեզ համար պատմության էջ չէ միայն. այն նաև հիշեցում է, թե որքան թանկ արժեք են խաղաղությունն ու մարդկային համերաշխությունը: Պատերազմների ու անկայունության պայմաններում աշխարհն այսօր կրկին կանգնած է խաղաղության պահպանման և անվտանգության ամրապնդման կարևոր խնդրի առաջ, իսկ մեզ համար առավել կարևոր է կարողանալ պաշտպանել մեր պետականությունը, ապահովել մեր ժողովրդի անվտանգ կյանքն ու վստահ ապագան:

Այսօր, երբ մեր տարածաշրջանում խաղաղության պահպանման յուրաքանչյուր քայլ ունի առանձնահատուկ նշանակություն, մենք պարտավոր ենք առավել պատասխանատու լինել մեր պետության, մեր հասարակության և գալիք սերունդների հանդեպ: Ուժեղ, զարգացող, անվտանգ և արժանապատիվ Հայաստանը մեր լավագույն պատասխանն է պատմության բոլոր փորձություններին և մեր լավագույն հարգանքի տուրքը՝ բոլոր նահատակների հիշատակին: Խոնարհում բոլոր հերոսների ու զոհվածների հիշատակի առաջ: Փա՛ռք հերոսներին և կեցցե՛ Հայաստանի Հանրապետությունը